

四庫全書

子部

欽定四庫全書

子部

古今事文類聚前集卷三十

詳校官中書臣康綸鈞

侍讀臣孫球覆勘

總校官編修臣王燕緒

校對官編修臣吳裕德

謄錄監生臣湯師錫

蘇定四庫全書

古今事文類聚前集卷三十

宋 祝穆 撰

仕進部

薦舉

舉雖舉親自薦舉自代垂歿舉代並附

羣書要語拔茅茹以其彙征吉

秦 儒有內稱不避親外

舉不避怨推賢而進達之不望其報

儒行

上臣事君以人

大獎賢所以報國

益勳

諺曰家有敝帚享之千金

魏文典論

朝取一人焉拔其尤暮取一人焉拔其尤

韓文

公之求士

甚於士之求公

坡文

古今事實

無言幾失

賈辛將適其縣見於魏子魏子曰辛來昔叔向適鄭驪  
蔑惡欲觀叔向從使之收器者而往立于堂下一言而  
善叔向將飲酒聞之曰必驥明也下執其手以上今子  
少不賜子若無言吾幾失子美言之不可以已也如是

遂如故知今女有力於王室吾是以舉女行乎敬之哉

毋墮乃力

昭二  
十八

舉七十家

趙文子所舉於晉國管庫之士七十有餘家

禮記

薦六十家

趙武薦白屋之士六十家

韓子

舉爾所知

仲弓問政子曰舉賢才曰焉知賢才而舉之曰舉爾所

知爾所不知人其舍諸

非此人不可

韓信亡去蕭何追之因薦於漢王曰必欲爭天下非信  
無可與計事者房玄齡曰餘人不足惜至於杜如晦王  
佐之才大王欲經營四方非如晦不可

有味其言

漢鄭當時字莊為大司農當時為大吏戒門下客至亡  
貴賤亡留門下者性廉又不治產卽奉賜給諸公然其

餽遺不過其器食每朝候上間未嘗不言天下長者其  
推轂士及官屬丞史誠有味其言也未嘗名吏與官屬  
言若恐傷之間人之善言進之上唯恐後山東諸公以  
此翕然稱鄭莊

薦經學

漢匡衡傳楊興說車騎將軍史高曰以將軍之幕府海  
內所仰望而所舉不過私門賓客乳母子弟富貴在身  
而烈士不舉是為狐白之裘而反衣之也平原文學匡

衡才智有餘經學絕倫以無階朝廷故隨牒在遠方誠  
召置幕府貢之朝廷必為國器

吾欲除吏

漢田蚡景帝皇后同母弟武帝時為丞相蚡以肺腑為  
相入奏事語移日所言皆聽薦人或起家至千石權移  
主上上曰君除吏盡未吾亦欲除吏

薦寵下士

灌夫為人剛直使酒不好面諛貴戚諸勢在己之右欲



必陵之士在己左愈賈賤尤益禮敬與鈞稠人廣衆薦寵下輩士亦以此多之

舉皆名士

韓安國嗜於財然所推舉皆廉士賢於己者也於梁舉壺遂臧固至佗皆天下之名士人亦以此稱慕之

不容私謝

張安世嘗有所薦其人未謝安世大恨以為舉賢達能豈有私謝耶絕弗復為通

不如一鶚

漢鄒陽諫吳王曰臣聞鶚鳥累百不如一鶚後漢龐參  
字仲達為左校令先零反御史中丞樊準薦參曰鶚鳥  
累百不如一鶚後漢孔融薦禰衡表曰伏見處士禰衡  
淑質正亮奇才卓犖若得龍躍天衢鳳奮雲漢垂光虹  
蜺足以近置之多士吳呂蒙廬陵賊起諸將不能下孫  
權曰鶚鳥雖百不如一鶚令蒙討平之

舉皆當才

鄧禹字仲華光武任使諸將多訪於禹禹每有所舉皆當其才

舉處士

陳蕃胡廣上疏薦徐孺子等曰伏見處士豫章徐孺子彭城姜肱德行純備著于人聽若使擢登三事叶亮天工必能增輝日月

薦恐人知

孔光薦舉惟恐其人之間知

拔十得五

蜀龐統字士元為郡功曹性好人倫每所稱述多過其才人怪問之曰當今雅道陵遲善人少惡人多今拔十得五猶可以崇邁世教使有志者自勵

薦多卿相

荀彧字文若前後所舉命世大才終為卿相者十數人

不進不休

荀令君之舉善不進不休

一字拔人

初蔡充未仕時河內山簡嘗與瑯琊王衍書曰蔡子尼  
今之正人行以書示衆曰山子以一字拔人

山公密啟

山濤字巨源為吏部尚書用人皆先密啟然後公奏舉  
無失才唯用陸亮尋賄敗濤為冀州甄拔三十餘人或  
為侍中尚書

以母言薦

吳隱之與太常韓康伯隣居康伯母殷浩之姊賢明婦人也隱之執母喪每聞其哭輟飧投筋為之悲泣既而謂康伯曰汝若居銓衡當舉如此輩人及康伯為吏部尚書隱之遂階清級

兄弟並舉

劉繇字正禮兄岱字公山兖州刺史陶丘洪薦繇欲令舉茂才刺史曰前年舉公山奈何復舉正禮洪曰明使君用公山於前擢正禮於後所謂御二龍於長塗騁騏

驥於千里不亦可乎

桃李在門

唐武后問狄仁傑朕欲得一佳士用之誰可者仁傑曰  
必欲卓犖奇才則有荊州刺史張柬之其人雖老宰相  
才也太后擢柬之為洛州司馬數日又問仁傑曰臣所  
薦者可為宰相非司馬也乃遷秋官侍郎又曰云云卒  
用為相又嘗薦夏官侍郎姚崇監察御史桓彥範太平  
州刺史敬暉數人率為名臣或謂仁傑曰天下桃李盡

在公門仁傑曰薦賢為國非為私也

藥籠中物

元行冲謂狄仁傑曰下之事上譬之富家儲積以自資也脯腊腠腴以供滋膳參朮芝桂以防疾疢門下充為味者多矣願以小人充備一藥石仁傑笑曰君正吾藥籠中物不可一日無

被薦不知

仁傑為相婁師德實薦之仁傑不知數擠師德於外武



后問仁傑曰師德知人乎曰未聞武后以告仁傑出嘆曰婁公盛德我為其所容

表薦布衣

蕭嵩為左拾遺常與布衣張鎬為友館而禮之表薦曰如鎬者用之則為王者師不用則幽谷一叟矣元宗擢鎬拾遺不數年出將入相

除吏八百

常袞當國凡奏請一杜絕之無所甄別賢愚同滯及崔

祐甫則薦舉推其人未踰年除吏幾八百員莫不諧允  
爭令出門下

柳子厚以博學宏詞科授校書郎藍田尉雋傑廉悍議  
論證據古今出入經史百子踔厲風發率常屈其座人  
名聲大振一時皆慕與之交諸公要人爭欲令出我門  
下交口薦舉之

墓誌

一薦四人

韓愈與陸祠部書曰文章之尤者有侯喜侯雲長者有

劉述古者其文長於詩當今舉於禮部者無與為比有  
崔羣玉者其文進而未止為人賢而有材志剛而氣和  
此四人皆可以當首薦

三人交薦

韓愈答楊子書云東野矻矻說足下不離口崔大敦詩  
不多見每每說人物亦以足下為處士之秀近又得李  
翱書亦云足下之文遠其兄甚夫以東野之賢其言一  
人固足信矣況又崔與李繼至而交說耶

奇寶橫道

韓愈薦樊宗師於袁滋相公書曰誠不忍奇寶橫棄道側

古靈薦賢

陳襄字述古號古靈先生紹興初詔曰近得陳襄薦章  
草起司馬光而下三十三人德行言語政事皆所具備  
審如所薦斯為盛矣今宜示百辟各舉所知

薦二臺官

孫抃為御史中丞薦唐介吳中復為御史人問曰公未嘗與二人相識遽薦之何也孫曰昔人耻呈身御史今豈求識面臺官耶後二人皆以風力聞天下孫晚為執政嘗嘆曰吾何功以輔政惟薦二臺官為無愧耳

夾袋冊子

呂蒙正公為相夾袋中有冊子四方人替罷謁見必問其有何人才客去隨即疏之悉分門類或有一人而數人稱之者必賢也朝廷求賢取之囊中故公為相文武

百官各稱職者以此

薦不示恩

范忠宣公在相位凡薦引人才必以天下公議所薦士未嘗知公公未嘗示恩意於人

殿直薦賢

有范延賞者為殿直押兵過金陵張忠定公為守因問曰天使公路來還曾見好官員否延賞曰昨過袁州萍鄉縣邑宰張希顏者雖不識之知其好官員也公曰何

以言之延賞曰自入縣境驛傳橋道皆完葺田萊墾闢  
野無惰農及至邑則墨肆無賭博市易不敢喧爭夜宿  
郵中聞更鼓分明以是知其必善政也公大笑曰希顏  
固美矣天使亦好官員也即日同薦於朝希顏為發運  
使延賞亦為閣門祗候皆號能吏也

我薦彼攻

王太尉薦寇萊公為相萊公數短太尉于上前而太尉  
專稱其長上一日謂太尉曰卿雖稱其美彼專談卿惡

太尉曰理固當然臣在相位久政事闕失必多準對陛下無所隱益見其忠直此臣所以重準也上由是益賢太尉

恩戒已出

王沂公曾為相士大夫有以差遣為請者公察其可用必正色却之既而擢用絕口未嘗與言子弟曰獨不使之知乎公曰用賢人主之事若使之知是我徇私請而市私恩也恩欲歸己怨使誰歸



寧受百欺

呂正獻既薦常秩後差改節常對伯淳有悔薦之意伯淳曰願侍郎寧受百人欺不可使好賢之心少替公敬納焉

未用復薦

程顥奏狀伏聞著作佐郎張載往明州推勘苗振公事竊謂近臣以其學行論薦故得召對朝廷必欲究觀其學業則事固有繫教化之本源者夫推案詔獄非謂儒

者之不當為然試之能吏非所以盡儒者之事業徒使四方之人謂朝廷以儒術賢業進人而以能吏之事試之則抱道脩潔之士益難自進矣

薦張橫渠

呂公著薦張載脩身講學為關右士人師表且深知邊境利害上特召對以為崇文院校書公又言載老矣宜任以事

薦程伊川

呂正獻公與溫公同奏舉河南處士程頤乞特加召命待以不次詔以為潁州推官國子監教授不就又以秘書省校書郎亦不就已而詔對便殿拜崇政說書乃受命議者譏頤辭卑而居尊

呂家傳

### 上當求下

程伊川與韓持國范夷叟泛舟于潁昌西湖須臾客將云有一官員上書謁見大資頤將謂有甚急切公事乃是求知已頤云大資居位却不求人乃使人倒來求已

是甚道理夷叟云只為正叔太執求薦章常事也願云不然只為曾有不求者不與來求者與之遂致人如此持國便服

薦歐陽公

韓魏公屢薦歐陽公仁宗不用他日復薦之曰韓愈唐之名士天下望以為相而竟不用使愈為之未必有補於唐而談者至今以為謗歐陽脩今之韓愈陛下不用臣恐後人如唐謗必及國陛下何惜不一試之以曉天

下後世也上從之

不識其面

韓魏公喜用知名士或不識其面既用之其人亦不知所薦

不受籠絡

韓魏公曰呂申公以進賢自任恩歸於已時士皆出其籠絡獨歐范尹旻收旋失之終不受其籠絡

無書獲薦

不干人薦

滎陽呂公希哲與諸人云自少官守處未嘗干人薦舉

以為後生之戒

童蒙訓

更薦范公

范公服中上宰相書言朝政得失王曾見而偉之時晏殊亦在京師薦一人為館職曾謂殊曰公知范仲淹捨不薦而薦斯人乎已為公置不行宜更薦仲淹殊從之

薦張密學

謝泌諫議居官不妄薦士或薦一人則焚香捧表望闕  
再拜而遣之所薦雖少而無不顯者泌知襄州日張密  
學逸為鄧城縣令有善政鄧城去襄城度漢水纔十餘  
里以暇日多乘小車從數吏渡漢水入鄧城界以觀風  
謠或載酒邀張野酌吟嘯終日而去其高逸樂善如此  
張亦其薦也

東軒  
筆錄

力過勢要

李師錫改京官仁宗覽其薦者三十二人師錫乃使相

王德用甥壻上曰保任之法欲以盡天下之才但薦執要孤寒何以進乃與師錫循資

亦不果薦

梅聖俞以蔭補為吏累舉進士輒抑於有司困於州縣自以其不得志者樂於詩而發之故其平生所作於詩尤多世既知之矣而未有薦於上者昔王文康公嘗見而嘆曰二百年無此作矣亦不果薦

歐陽作詩序

遜薦時賢



劉錡與李常友善發運使楊佐欲薦常改官常願先錡  
佐曰不見此風久矣並薦之

材館錄

虞允文為相懷袖有一小方冊目曰材館錄如汪應辰  
趙雄胡銓張震洪遵梁克家留正一時得人之盛有慶  
厯元祐風行狀

祁奚舉解狐以下係舉讎

祁奚請老晉侯問嗣焉稱解狐其讎也將立之而卒又

問焉對曰午也可於是羊舌職死矣晉侯曰孰可以代之對曰赤也可於是使祁午為中軍尉羊舌赤佐之君子謂祁奚能舉善矣稱其讎不為諂立其子不為比舉其偏不為黨解狐得舉祁午得位伯華得官建一官而三物成能舉善也

左襄二

解狐舉荊伯柳

解狐與荊伯柳為怨趙簡主問於解狐曰孰可以為上黨守對曰荊伯柳可趙簡曰非子之讎乎對曰臣聞忠

臣舉賢不避仇讎

韓子

舅犯舉虛子羔

晉文公問於舅犯誰可使為西河守者對曰虛子羔曰  
子羔非汝之仇歟曰君問為守者非問臣之仇也子羔  
見舅犯謝之曰君幸赦臣之過薦之於君得為西河守  
舅犯曰薦子者公也吾不以私事害公議子其去矣顧

吾射子矣

說苑

蕭何薦曹參

曹參微時與蕭何善及為相有隙至何死所推惟曹參

蔣欽薦徐盛

蔣欽屯宣城徐盛收欽屯吏表斬之盛常畏欽因事害已而欽亦稱其善孫權曰君欲慕祁奚耶欽曰公舉不扶私怨盛忠而勤強有膽畧今大事未定當助國求才豈敢扶私恨以蔽賢能權嘉之

祁奚舉子

以下係舉親

魏子謂成鱣曰吾與成也縣人其以我為黨乎對曰何

也成之爲人也遠不忘君近不偪同居利思義在約思  
純雖與之縣不亦可乎昔武王克商光有天下其兄弟  
之國者十有五人姬姓之國者四十人皆舉親也

謝安薦兄子

苻堅強盛邊境數被寇侵朝廷求文武將鎮禦謝安以  
兄子玄應舉却超嘆曰安違衆舉親明也玄必不負奇  
才也

仁傑薦子

狄仁傑子光嗣為司空丞武后詔丞相各舉尚書郎一人仁傑薦光嗣後稱職后曰祁奚內舉果得人

韋貫之舉弟

韋貫之為監察御史舉其弟纁自代議者不謂之私

祐甫多親故

肅宗謂崔祐甫曰人言卿擬官多親故何也對曰陛下令臣薦擬庶官夫薦擬者必悉其才行如不聞知何由得實帝然之

曹侍中薦子

曹侍中將薨車駕親臨視之問以後事對曰臣無事可言固問之對曰臣二子燾與煒材器有取臣若內舉皆堪為將上問優劣對曰燾不如煒已而果然

凍水

文穆薦姪

呂文穆

蒙正

致政居洛真宗祀汾陰過洛文穆尚能迎謁

至回鑾已病帝幸其宅問曰卿諸子孰可用對曰臣諸子皆豚犬不可用有姪夷簡任潁川推官宰相才也帝

記其語遂至大用

舉其表弟

程顥為御史神宗嘗使推擇人材先生薦數十人而以父表弟張載及弟頤居首

行狀

伊尹干湯

以下係自薦

伊尹蒙耻辱負鼎俎和五味以干湯

東方朔傳

郭隗自薦

燕昭王謂郭隗曰齊因吾國亂而襲破燕孤極知燕小



誠得賢士以共圖雪先王之耻孤之願也先生視可者  
得身事之隗曰王必欲致士先從隗始況賢於隗者豈  
遠千里哉昭王為隗改築宮而師事之樂毅自魏往鄒  
衍自齊往劇辛自趙往士爭趨燕遂以樂毅為上將軍  
策戰國

冶躍之金

莊子曰大冶鑄金金踴躍曰我且必為鏌鋣大冶以為

不祥之金

借  
用

毛遂自贊

秦圍邯鄲趙使平原君求救合從於楚約食客文武具  
備者二十人偕得十九人餘無以滿有毛遂者前自贊  
於平原君曰願備員而行平原君曰夫賢士譬若錐之  
處囊中其末立見先生未有所聞毛遂曰臣得早處囊  
中乃脫穎而出非特末見而已遂以為上客

方朔自譽

東方朔上書文辭不遜高自稱譽上偉之令待詔公車

漢士自鬻

漢武帝召天下賢良文學材力之士待以不次之位四

方士多上書言得失自鬻者以千數

東方朔傳

張敞上書

渤海膠東盜賊並起張敞上書請自治之

王霸自陳

光武過潁陽王霸率賓客上謁願充行伍曰臣援歸身  
聖朝本無公卿一言之薦左右為容之助臣不自陳陞

下何因聞之也

獻文不報

唐舒元興獻文闕下不報上書自言漢主父偃以布衣上書朝奏暮召臣所上八萬言鍛鍊精粹出入今古數千百年拔犀之角推象之齒豈主父偃等可比哉

呂蒙舉代

以下係  
自代

呂蒙至都權問誰可代卿者蒙對曰陸遜意思深長才堪負重乃召遜拜偏將軍右都督以代蒙

漢獻  
紀

鍾皓舉代

陳寔出於單微鍾皓為郡功曹辟司徒府臨辭太守問誰可代卿者皓曰明府必欲得其人西門亭長陳寔可寔聞之曰鍾君似不察人不知何獨識我太守遂以寔為功曹

漢質紀

韓愈舉代

韓愈薦錢徽自代表云時名年輩俱在臣前擢以代臣必允衆望

管仲舉代

以下係垂  
歿舉代

管仲病桓公問曰羣臣誰可相者易牙何如對曰殺子  
以適君非人情不可公曰開方何如對曰倍親以適君  
非人情難近公曰豎刁何如對曰自宮以適君非人情  
難親管仲死而桓公不用管仲言卒進用三子三子專  
權

蕭何舉代

蕭何不與曹參相能及何病患帝自臨視固問曰君即

百歲後誰可代君對曰知臣莫如主帝曰曹參何如何  
頓首曰帝得之矣臣死不恨矣

丙吉舉代

丙吉病上問可以自代者吉曰羣臣行能明主所知上  
固問吉乃曰西河守杜延年明於法度曉國家事前為  
九卿十餘年今在郡治有能名廷尉于定國執憲詳平  
天下自以為不寬太僕陳萬年事後母孝謹此三人能  
在臣右上許之相次用以為相

周瑜舉代

周瑜病困上疏曰魯肅智畧足任乞以代瑜肅

傳

羊祜舉代

羊祜疾篤舉杜預自代

晉世祖紀

王旦舉代

王旦疾久不愈上命肩輿入禁中使其子雍與直省吏扶之見於延和殿勞勉數四因命曰卿今疾亟萬一有不諱使朕以天下事付之誰乎旦謝曰知臣莫若君惟



明主自擇再三問不對是時張詠馬亮皆為尚書上曰  
張詠如何不對又曰馬亮如何又不對上曰試以卿意  
言之旦強起舉笏曰以臣之愚莫如寇準上憮然有間  
曰準性剛褊卿更思其次旦曰他人臣不知也旦死歲  
餘卒用準為相

藍元震云

### 古今文集

雜著

雜說

韓愈

世有伯樂然後有千里馬千里馬常有而伯樂不常有故雖有名馬祇辱於奴隸人之手駢死於槽枥之間不以千里稱也馬之千里者一食或盡粟一石食馬者不知其能千里而食也是馬雖有千里之能食不飽力不足材美不外見欲與常馬等不可得安求其能千里也策之不以其道食之不能盡其材鳴之而不能通其意執策而告之曰天下無馬嗚呼其真不知馬也邪

為人求薦書

韓愈

某聞木在山馬在肆過之而不顧者雖日累千萬人未  
為不材與下乘也及至匠石過之而不睨伯樂遇之而  
不顧然後知其非棟梁之材超逸之足也以某在公之  
宇下非一日而又辱居姻婭之後是生于匠石之園長  
于伯樂之廐者也於是而不得知假有見知者千萬人  
亦何足云耳今幸賴天子每歲詔公卿大夫貢士若某  
等比咸得以薦聞是以冒進其說以累於執事其知某  
何如哉昔人有鬻馬不售于市者知伯樂之善相也從

而求之伯樂一顧價增三倍某與其事頗相類是故始  
終言之

三上宰相書

韓愈

前進士韓愈謹伏光範門下再拜獻書相公閣下云云  
今若聞有以書上宰相而求仕者宰相不辱焉而薦之  
天子天子爵命之而布其書於四方枯槁沉溺魁閹寬  
適之士必且洋洋焉動其心戔戔焉簪其冠于于焉而  
來矣此所謂勸賞不必徧加乎天下而天下從焉者也

再上書云向上書及所為文後待命凡十有九日不得命恐懼不敢遁逃不知所為乃復敢自納於不測之淵以求畢其說而請命於左右 三上書云愈之待命四十餘日矣書再上而志不得遁足三及門而閤人辭焉惟其昏愚不知逃遁故復有周公吐握之說焉

古詩

送諸葛覺往隨州讀書

韓愈

鄴侯

李泌之子繁

餘五十出守數已六京邑有舊廬不容久

食宿臺閣多官員無地寄一足我雖官在朝氣勢日局  
縮屢為丞相言雖懇不見錄

贈崔斯立

韓愈

藍田十月雪塞關我興南望愁羣山攢天崔嵬凍相映  
公乃寄命於其間秋卑俸薄食口衆豈有酒食開容顏  
殿前羣公賜食罷驂騑踏路驕且閑稱多量少墜裁密  
豈念幽桂遺蓁菅幾欲犯嚴出薦口氣象肆兀未可攀

律詩

贈獻納起居田舍人

杜甫

獻納司存雨露邊，地分清切任才賢。  
舍人退食收封事，宮女開函近御筵。  
曉漏追趨青瑣闥，晴牕點檢白雲篇。  
揚雄更有河東賦，唯待吹噓送上天。

詩話

近水向陽

范文正知杭州，蘇鱗為屬縣。巡檢城中兵官往往皆獲薦，書獨鱗在外。邑未見收錄，因公事入府獻詩曰：近水

樓臺先得月向陽花木易為春文正薦之

作詞謝薦

呂中公累乞致仕仁宗不允他日復扣便座度不可留  
因詢曰卿去誰堪代者申公曰知臣莫若主陛下自擇  
堅問之乃引陳文惠曰陛下必欲得英俊經綸之臣則  
臣所不知若圖任老臣鎮安百度周知天下無如陳堯  
佐仁宗然之堯佐遂大拜極懷薦引之德因作燕詞攜  
酒過之申公使之歌焉



二社良辰千家庭院翩翩又見新歸燕鳳凰巢穩許為  
鄰瀟湘煙暝來何晚亂入紅樓低飛綠岸盡梁時拂歌  
塵散為誰歸去為誰來主人恩重珠簾卷中公笑曰自  
恨捲簾人已老莫愁調鼎子無功老於廊廟而醞藉如  
此

因詩論薦

見餘屬部

薦而大用

王荊公薦進一二寒士位侍從初無意於大用也公去

位後遂叅政公時有詩寄意云本種醅醑架金沙只謾  
栽自矜顏色好飛度臘前開

曹慥詩話

不願其薦

張鑄以東京轉運使降通判太平州時葛源為提舉取  
張脚色欲發薦狀張以詩與之云提司坑冶是新差職  
比催綱勝一階若發薦章求脚色下官踪跡轉沉埋

錄

辟舉

羣書要語聘名士禮賢者禮史職滿歲宰府州郡乃得

辟舉

左雄疏

古今事實

謹簡乃僚

穆王命伯冏為周太僕正曰謹簡乃僚

自辟其屬

漢自詔舉之外其府寺郡國屬吏皆令自辟故河南守  
吳公台賈誼致門下 孫寶明經張忠辟寶為屬楊震

辟杜喬胡廣辟李膺

辟而不用

太原閔仲叔世稱節士建武中應司徒侯霸之辟既至  
霸不及政事徒勞苦而已仲叔恨曰以仲叔為不足問  
耶不當辟辟而不問是失人也遂投劾而去

周燮等傳序

為親而喜

後漢毛義家貧以孝行稱府檄以為郡丞義以手捧檄  
而入喜動顏色張奉薄之後義母亡遂不仕奉嘆曰往

日之喜乃為親也力田不如逢年善任不如遇合

太史公云

### 焦鴈成羣

陳羣父子並著高名世號三君每宰府辟召常同時旌命焦鴈成羣當世靡不榮之

續漢書

### 投傳而去

豫州刺史周景辟陳蕃為別駕從事蕃以諫諍不合投傳而去注傳符也

本傳

### 辟謝安

謝安及弟萬廢黜始有仕進志年已四十餘矣桓溫請為司馬發新亭朝士咸送既到溫喜甚言平生歡笑竟日安出溫問左右頗嘗見我有如此客不

下車連辟

晉江統字應元東海王越為兗州牧以統為別駕委以州事與統書曰昔王子師為豫州未下車辟荀慈明下車辟孔文舉貴州人士有堪應此者不統舉郗覽為賢良阮脩為直言程收為方正時以為知人

表留幕府

唐太宗為秦王府屬多外遷房玄齡曰如晦王佐才表  
留幕府

幕府得人

裴度充淮西宣慰招討處置使仍以刑部尚書馬摠為  
副太子右庶子韓愈為彰義行軍司馬司勳員外郎李  
正封都堂員外郎馮宿禮部員外郎李宗閔等為兩史

判官書記

度傳

屈數旬居

唐韋思謙傳沛王府長史皇甫公義引思謙為參軍謂曰公非池中物屈公為數旬容以重此府耳

使主留後

郭子儀辟杜黃裳佐朔方府子儀入朝使主留後諸將驕蹇者皆以子儀令易置衆不敢亂

法不敢私

儂智高叛仁宗遣樞密副使狄青為宣撫使青受命有



因貴近求從青行者青延見謂之曰君欲從青行此青之所求也何必因人之言乎然能擊賊有功朝廷有厚賞青不敢不為之請也若往而不能擊賊則軍中法重青不敢私也君其思之聞者大駭其所辟取皆青之素所予以為可用者人望固已歸矣

南豐  
雜誌

### 幕府名士

天聖明道中錢文僖留守西都謝希深為通判歐陽永叔為推官尹師魯為書記梅聖俞為主簿皆天下之名

士間見  
錄

書局辟官

司馬公光作通鑑英宗命置局秘閣以其所素賁者劉攽劉恕范祖禹為屬又奏其子康為檢閱文字除秘書省正字遷校書郎

客可為師

范文正公言幕府辟客須可為師者乃辟之雖朋友亦不可辟遺事

古今文集

雜著

徐泗濠州節度掌書記廳石記

韓愈

帥南陽公自御史濠壽廬三州觀察使授節移鎮徐州  
歷十一年而掌書記者凡三人其一人曰高陽許孟容  
入仕于王朝今為尚書禮部郎中其一人曰京兆杜兼  
今為尚書禮部員外郎觀察判官其一曰隴西李博自

前鄉貢進士換祕書省校書郎方為之南陽公文章稱天下其所辟實所謂宏辨通敏兼人之才者也後之人苟有未知南陽公之文章吾請觀於三君子苟未知三君子之文章吾請觀於南陽公可知矣蔚乎其相扶炳乎其相輝志同而氣合魚川泳而鳥雲飛也愈樂是賓主之相得也故請刻石以紀之

送石洪處士序

送溫造處士序

並見僚屬門

古詩

節婦吟寄東平李司空

辭辟  
命作

張籍


君知妾有夫，贈妾雙明珠。  
感君纏綿意，繫在紅羅襦。  
妾家高樓連苑起，良人執戟明光裏。  
知君用心如日月，事夫誓擬同生死。  
還君明珠雙淚垂，何不相逢未嫁時。

送石處士赴河陽幕

韓愈

長把種樹書人云，避世士忽騎將軍馬。  
自號報恩子，風

雲入壯懷泉石別幽耳鉅鹿帥欲老常山險猶恃豈惟  
彼相憂固是吾徒耻去年事方急酒行可以起



古今事文類聚前集卷三十

# 欽定四庫全書

子部

古今事文類聚前集卷三十一

詳校官中書<sub>臣</sub>康綸鈞

侍讀<sub>臣</sub>孫球覆勘

總校官編修<sub>臣</sub>王燕緒

校對官編修<sub>臣</sub>吳裕德

謄錄監生<sub>臣</sub>湯師錫

欽定四庫全書

古今事文類聚前集卷三十一

宋 祝穆 撰

仕進部

交代

羣書要語執柯以伐柯其則不遠中庸顏淵曰瞻之在前

忽焉在後語瞠乎其若後莊子卻行以求及前人莊子更有

三品有卒更有踐更有過更古者正卒無常人皆迭為



之一月一更是為卒更貧者欲得雇更錢者次直者出錢雇之一月二十是謂踐更天下之人皆直戍邊三日亦名為更律所謂徭戍也雖丞相子亦在戍邊之調一歲一更諸不行者出錢三百入官以給戍者是為過更

漢昭  
紀註

古今事實

舊政告新

子張問曰令尹子文三仕為令尹無喜色三已之無愠

色舊令尹之政必以告新令尹何如子曰忠矣曰仁矣  
乎曰未知焉得仁

舊貫不改

魯人為長府閔子騫曰仍舊貫如之何何必改作

借用

及瓜而代

齊侯使連稱管至父戍葵丘瓜時而往曰及瓜而代

左莊

八年

將死授政

鄭子產疾謂子太叔曰我死子必為政惟有德者能以  
寬服民其次莫如猛

左昭  
二十

反間代去

樂毅下齊七十餘城獨莒即墨未服會燕昭王死子立  
為惠王惠王自為太子時嘗不快於樂毅田單聞之乃  
縱反間於燕曰齊不下者兩城耳樂毅與燕新王有隙  
欲連兵且留齊南面而王齊於是惠王使騎劫代將而  
召樂毅毅畏誅遂降趙趙封樂毅曰望諸君田單後與

騎劫戰設詐誑燕軍遂破騎劫於即墨下

蕭規曹隨

曹參代蕭何為相國舉事無所變更壹遵何之約束百姓歌曰蕭何為法較若畫一曹參代之守而勿失載其

清靜民以寧壹

本傳

蕭規曹隨功若太山

揚雄傳

前召後杜

後漢杜詩遷南陽太守治政清平時人方於召信臣為之語曰前有召父後有杜母

以嚴繼寬

班超為西域都護年老求還詔以任尚代之尚謂曰小人猥承君後宜有以誨之超曰塞外吏士本非孝子順孫皆以罪過徙補而蠻夷懷鳥獸心難養易動今君性嚴急水清無大魚察政不得下和宜蕩佚簡易寬小過總大綱尚私謂所親曰我以班君當有奇策今所言平平耳尚至數年西域反亂以罪被徵如超所言

按校代者

韓延壽代蕭望之為左馮翊而望之遷御史大夫會御史當問事東郡望之因令并問延壽在東郡時放散官錢千餘萬延壽聞知即部吏按校望之在馮翊時廩犧官錢放散百餘萬上各令窮竟所考望之卒無事實望之遣御史案東郡具得其事延壽竟坐棄市

謝令不去

鄧攸去郡不受一錢百姓數千人留牽攸船不得進乃小停夜中發去吳人歌之曰紈如打五鼓鷄鳴天欲曙

鄧侯挽不留謝令推不去

我棄彼取

見同列門

代者挾怨

晉王述為會稽太守以母喪居郡境王羲之代述止一  
弔述每聞角聲謂羲之當詣已如此者累年羲之竟不  
顧

垂成而代

祖逖為豫州刺史大興攻討北地遂平由是黃河以南

盡為晉土石勒不敢窺兵河南遯方當推鋒越河掃清  
冀朔會朝廷遣戴若思為都督遯意甚怏怏感激發病  
有妖星見俄卒于雍丘

狗尾續貂

晉趙王倫篡位至于奴卒廝役亦加以爵位每朝會貂  
蟬盈坐時人語曰貂不足狗尾續

糠粃在前

孫綽與習鑿齒並行綽在前顧謂鑿齒曰沙之汰之瓦



石在後鑿齒曰簸之颺之糠粃在前

不改前政

謝方明善治郡所至有能名承前代人不易其政必當改者則以次漸移變使無跡可尋

門生為代

范津初薦傳燮及津為漢陽與燮交代合符而去

遭謗除代

梁江革為廬陵王長史行江州府事正直自居不與典

籤趙道智坐道智還都言革情事好酒以王曇聰代為  
行事南州為之語曰故人不道智新人佞散騎莫知度  
不度新人不如故

各任所長

歐陽公知開封府所代包孝肅公以威嚴御下名震都  
邑公簡易循理不求赫赫之譽有以包公之政勵公者  
公曰凡人才性不一強其所短勢必不逮吾亦任吾所  
長耳

為代懷怨

詹大和堅老來京師省試罷坐微累下大理李傳正端  
初為少卿堅老哀鳴端初操俚談詬曰子甯尖如此誠  
奸人也因困辱之已而榜出奏名在法當釋自此名不  
相聞後十年端初為淮南轉運副使既及瓜堅老自郎  
官出為代既再見端初頗省其面目猶不記前事因曰  
郎中若有素者豈嘗邂逅朝路中耶風采堂堂非曩日  
比也堅老答曰風采堂堂固非某所見但不知比往時

甯不尖否端初愧怍而悟

揮塵錄

古今文集

雜著

託契子孫

同僚之契交承之分有兄弟之義至其子孫亦世講之前輩專以此為務今人知之者蓋少矣

童蒙訓

詩話

同年為代

王文正公曾李文定公迪皆狀元及罷相領青又為交承故文正送文定詩有錦標得雋曾相繼金鼎調元亦踐更之句

樂人餞詩

楊叔寶郎中典眉州人言頃眉守視事後三日作大排樂人獻口號其末句云為報士民須慶賀災星去了福星來守喜召優人謂曰大排致語誰做對曰本州自來舊例用此一首

湘山錄

笑啼不敢見鏡門

謫罰

羣書要語投諸四裔以禦魑魅尚書注五流有宅五宅三

居舜典屏之遠方書注緩死申恩徙於瘴癘六帖投荒六帖左遷

上同紕爵禮免所居官漢書逐臣遷客六帖繫縲之臣左信

無罪而棄逐騷俟罪荒陬騷注故事有百適者斥陳遵傳頻

謫遠郡削迹朝端李邕

詩句溪行防水弩野店避山魈張祐寄遷客

古今事實

舜去四凶

舜流共工於幽州放驩兜於崇山竄三苗於三危殛鯀於羽山

三已無愠

令尹子文三已之無愠色

直道三黜

柳下惠為士師三黜曰直道而事人焉往而不三黜

楚囚南冠

楚子重侵陳以救鄭晉侯觀于軍府見鍾儀問之曰南冠而縶者誰也有司對曰鄭人所獻楚囚也使稅之召而弔之間其族曰伶人也使與之琴操南音范文子曰楚囚君子也樂操土風不忘舊也遂釋之

行吟澤畔

屈原既放乃行吟澤畔為懷沙賦沉汨羅而死

居常鞅鞅





高祖赦韓信封為淮陰侯信稱病不朝居常鞅鞅與絳灌等列過樊將軍噲噲跪拜送迎言稱臣曰大王肯臨臣信出門笑曰生乃與噲等伍

受辱獄吏

周勃下廷尉吏稍侵辱之勃以千金與獄吏吏乃書牘背示之勃既出曰吾嘗將百萬軍然安知獄吏之貴乎

誼謫長沙

賈誼謫為長沙太傅有服飛入誼舍止於坐隅服似鵝

不祥鳥也。謫居長沙卑濕，自傷以為壽不得長，乃為賦以自廣。

獄吏蹈蹴

陳蕃送黃門北寺獄黃門從官騶蹈蹴蕃曰老死魅復能損我曹負數奪我曹廩假否

書空咄咄

殷浩被黜談詠不輟雖家人不見其有流放之感但終日書空作咄咄怪事四字而已浩甥韓伯隨至徙所經

歲還都浩送至渚側詠曹顏遠詩云富貴他人合貧賤  
親戚離因而泣下

闔戶避謗

陸宣公至忠州土塞其門鹽菜由狗竇中端坐抄藥方  
兒姪亦罕與語會轉運使至京上問爾峽中過聞陸贄  
何面孔具以狀對上惻然拜太子賓客已卒

丁用晦  
芸田錄

獨未收拭

唐吳武陵與孟簡書曰柳子厚斥已十二年程劉二韓

皆已收拭獨子厚與猿鳥為伍

忤心陰責

張九齡為宰相建言放臣不宜與善地悉徙五溪不毛處然九齡自內職出始安有瘴癘之歎罷政守荊州有拘囚之思身出遐陬一失意不能堪矧華人士族必致醜地然後快意哉議者以為開元良臣而卒無嗣豈忤心失恕陰責最大雖他美莫贖耶

劉禹錫  
曲江序

貶死朱崖

新繁縣有東湖德裕為宰日所鑿夜夢一老父曰某潛  
形其下幸庇之明府富貴今鼎來七九之年當相見於  
萬里外後於土中得一墓徑數尺投之水中而德裕以  
六十三卒於朱崖果應七九之讖公卒見夢於令狐綯  
曰公幸哀我使我歸塋綯曰衛公精爽可畏不言禍將  
及乃白于帝得以喪還

瑣言

謫居喪母

柳宗元謫永州司馬侍奉太夫人河東縣君溫清未嘗

見憂終于州之佛寺其孤有罪銜哀待刑不得歸奉喪  
事姪泊太夫人兄之子弘禮承事焉嗚呼天乎太夫人  
有子不令以及是也又今無適主以葬天地有窮此冤

無窮

墓誌

春州惡地

盧多遜貶朱崖諫議大夫李符求見趙普言朱崖雖在  
海外而水土無他惡春州雖在內地而至者必死望追  
改前命以外彰寬宥乃寘於必死之地普頷之後月餘

符坐事貶宣州行軍司馬上怒未已令再貶嶺外普具  
述其事即以符知春州到郡月餘卒

湘山野錄

直言遭貶

唐質肅公介為御史論文潞公專權植黨交結宮禁仁  
宗怒召二府示之疏唐公語益切樞密副使梁公適叱  
唐公下殿詔送臺劾之公獨留再拜曰御史言事職也  
願不加罪於是唐公既貶而公亦罷相其後公再入相  
首薦唐公復召用焉

言行錄

居停主人

丁謂既逐李文定於衡州遣中使賫詔賜之不道所以  
李聞之欲自裁其子東之救之得免謂因肆行貶竄王  
欽若丁度等皆投之遠方時王沂公參政不平之曰責  
太重矣謂熟視久之曰居停主人恐亦不免也沂公蹶  
然而懼因密謀去之以擅移山陵劾謂雖沂公以計傾  
之而公議不以為非也

龍川志

失明遭貶



范忠宣公素苦目疾忽全失其明因上表乞致仕章子厚戒堂吏更不得上貶公永州安置公怡然就道或謂公近名公聞而歎曰七十之年兩目俱喪萬里之行豈其欲哉但區區愛君之心不能自己人若避好名之嫌則無為善之路矣

為子所累

陳了翁自嶺外歸居明州嘗令其子正彙幹事錢塘間蔡宝託說蔡京之福厚其事有動搖東宮之迹不敢隱

默乃自陳于帥司蔡薺時為抗帥方與京叙宗盟結死  
黨遂執正彙送京師而飛書告京俾為計事下開封制  
獄獄辭果不右正彙而公亦連逮開封尹李孝偁脇誘  
公使證正彙之妄公曰正彙聞蔡京將不利於社稷傳  
於道路遽自陳告瓘豈與知若瓘以所不知忘父子之  
恩而指其為妄則情所不忍挾私情以符合其說又義  
所不為況不欺不貳平昔所以事君教子豈于利害之  
際有所貪畏自違其言乎蔡京姦邪必為國禍瓘固嘗

論於諫省亦不待今日語言間也時內侍黃經臣監勘  
聞公所對失聲嘆息謂公曰主上正欲得實右司但依  
此供狀其後獄具正彙猶坐所言過實流竄海島公亦  
有安置通州之命

遺事

攜母貶所

紹聖初黨禍起劉安世器之尤為章惇蔡卞所忌遠謫  
嶺外盛夏奉老母以行途人皆憐之器之不屈也一日  
行山中扶其母籃舁憩樹下有大蛇冉冉而至草木皆

披靡擔夫驚走器之不動也蛇若相向者久之乃去村民羅拜器之曰官異人也蛇此山之神見官喜相迎耳

聞見錄

### 失儀被謫

真宗朝張文定公齊賢元會上壽以微醺進止失容坐謫安州其麻曰仍復酣醬杯觴敬傾冠弁蓋謂是也

青箱

雜記

### 崖州為大

丁謂謫崖州嘗謂客曰天下州郡孰為大客曰京師也謂曰不然朝廷宰相為崖州司戶則崖州為大也聞者絕倒

寫黨錮傳

黃山谷謫宜州時黨禁甚嚴倅余若著為之經理舍館一旦請曰先生今日舉動無愧東都黨錮諸賢願寫范孟博一傳許之遂默誦大書盡卷僅有二三字疑誤次年遂仙去

挈子隨侍

東坡謫惠州獨以少子過自隨瘴癘所侵蠻蜮所侮胸  
中泊然無所芥蒂人無賢愚皆得其懽心疾苦者畀之  
藥殞斃者納之窆又率衆為大橋以濟病涉者惠人愛  
敬之大臣猶以為未足復以瓊州別駕安置昌化昌化  
非人所居食飲不具藥石無有所僦官屋以庇風雨有  
司猶謂不可則買地築室昌化士人畚土運甓以助之  
為屋三間人不堪其憂公食芋飲水著書以為樂時從

其父老遊亦無間也

墓誌

遇雨戴笠

東坡在儋耳一日過黎子雲遇雨乃從農家借笠笠戴之著屐而歸婦人小兒相隨爭笑

僦屋獲罪

紹聖中蘇轍貶雷州僦州人吳國鑑宅居為創一小閣元符初本州走馬承受段諷言其事詔提舉董必具實狀以聞必至雷置獄根治詔轍移循州知州張逢以下

降罰有差國鑑編管

民居不僦

蘇轍謫雷不許占官舍遂僦民屋章子厚以為強奪民居下州追民究治以僦券甚明乃已及子厚謫雷州亦問舍于民民曰前蘇公來為章丞相幾破我家今不可也人以為報

杜門莫見

蘇黃門子由南遷既還卜居許下多杜門不通賓客有



鄉人自蜀中來求見之伺候於門彌旬不得通宅南有叢竹竹中為小亭遇風日清美或徜徉亭中鄉人既不得見則謀之閤人閤人使待於亭旁如其言復旬日果出鄉人因趨進黃門見之大驚勞久之曰子姑待我於此翩然復入迨夜竟不復出

却掃編

盡呼相公

陳瑩中云嶺南人見逐客不問官之尊卑盡呼相公豈非相公愛遊此乎近日瑩中赴龍城士美相繼過桂又

報伯紀來因念瑩中言發一笑

折彥質記

以義相勉

鄒浩除言官有田畫者與浩善一日報立皇后劉氏畫  
曰鄒君不言可以絕矣又一日鄒以書約畫會潁昌自  
云得罪責昭州留連三日臨別出涕畫正色責之曰使  
君隱默官京都遇寒疾不汗五日死矣豈獨嶺外能死  
人哉願毋以此自滿

事畧

貶中喪子

趙忠簡公鼎初謫潮州時哭其季子而行既行又喪長子嘗有帖云知舊多勸讀佛書使釋迦老子聞鼎此事亦當感動

客至對卧

范忠宣謫居永州客至必見之對設兩榻多自稱老病不能久坐徑就枕亦授客一枕使與對卧數語之外往往鼻息如雷客待其覺有至終日不得交一談者

時相詭詐

秦會之千鬼萬怪如不樂這人貶竄將去却與他慇懃

不絕一日忽招胡和仲

文定子

飯意極拳拳比其還家則

臺章已下又送白金為贐如欲論其人章疏多是自為  
以授言者做得甚好傅安道諸公往往認得如見彈洪  
慶善章曰此秦老筆也

朱語錄

### 階官安置

本朝舊法貶責人若是庶官亦須帶別駕或司馬無有  
帶階官者今呂子約却是帶階官安置

同上

古今文集

雜著

弔屈原賦

賈誼

恭承嘉惠兮竢罪長沙  
及聞屈原兮自湛汨羅  
造託湘流兮敬弔先生  
遭世罔極兮廼隕厥身  
鸞鳳伏竄兮鷗鵲翱翔  
闕茸尊顯兮讒諛得志  
聖賢逆曳兮方正倒植  
謂隨夷溷兮謂跖躒廉  
莫邪為鈍兮鉛刀為銛  
幹棄周鼎寶康瓠兮騰  
駕罷牛驂蹇驢兮驥垂  
兩耳服鹽車兮

使麒麟可係而羈兮豈云異夫犬羊鳳凰翔于千仞兮  
覽德輝而下之見細德之險微兮遙矰擊而去之彼尋  
常之污瀆兮豈容吞舟之魚橫江湖之鱣鯨兮固將制  
於螻蟻

囚山賦

柳宗元

楚越之郊環萬山兮勢騰踊夫波濤紛對迴合仰伏以  
離迥兮若重墉之相褒爭生角逐上軌旁出兮其下圻  
裂而為壕欣下頽以就順兮曾不畝平而又高嵒雲而

漬厚土兮蒸鬱勃其腥臊陽不舒以擁隔兮羣陰呀而  
為曹側耕危穫苟以食兮哀斯民之增勞積林麓以為  
叢棘兮虎豹咆囁代狴牢之吠嗥胡井眚以管窺兮窮  
坎險其焉逃顧幽昧之罪加兮雖聖猶病夫嗷嗷匪兇  
吾為桺兮匪豕吾為牢積十年莫吾省者兮增蔽吾以  
蓬蒿聖日以理兮賢日以進誰使吾山之囚兮滔滔

謫九年賦

劉禹錫

莫高者天莫濬者泉推以極數無踰九焉伊我之病至

于數極又曰稽天道與人紀咸一僨而三起去無久而  
不還焚無久而不理何吾道之一窮兮貫九年而猶爾  
古詩

書竄詩

為唐介作事  
見言事門

梅聖俞

皇祐辛卯冬十月十九日御史唐子方危言初造膝曰  
朝有巨姦臣介所憤嫉願條一二事臣職敢妄率宰相  
文彥博邪行世莫匹曩時守成都委曲媚貴暱銀璫插  
左貂窮臘使馳驛邦媛將夸侈中金齎十鎰為我寄使



君奇紋織纖密遂煩西蜀巧日夜急鞭扶紅經緯金縷  
排科闢八七比比雙蓮花篝燈戴星出幾日成一端持  
行如鬼疾明年觀上元被服穩稱質璨然驚上目遽爾  
有薄詰既聞所從來佞對似未失且云奉至尊於妾豈  
能必遂回天子顏百事容丐乞臣今得粗陳狡猾彼非  
一偷威與賣利次第推甲乙是惟陰猾雄仁斷宜勇黜  
必欲致太平在列無如弼弼亦昧平生況臣不阿屈臣  
言天下公奚以身自卹君旁有側目喑啞橫詆叱指言

為罔上廢汝還蓬革是時白此心尚不避斧鑕雖令禦  
魑魅甘且同飴蜜既知弗可懼復以強詞窒帝聲亦大  
厲論奏不容畢介也容甚閑猛士膽為慄立貶嶺外春  
速欲為異物內外官恟恟陞下何未悉即敢救者誰襄  
執左右筆謂此儻不容盛美有所拂平明中執法懷䟽  
又堅述介言或似狂百豈無一實恐傷四海和幸勿苦  
倉卒亟許遷英山衢路猶嗟咄翊日宣白麻稱快口盈  
溢阿附連諫官去若壞絮蟲其間因獲利竊笑等蛇鷸

英州五千里瘦馬行駢駢毒蛇噴曉霧晝與嵐氣沒妻  
孥不同途風浪過蛟窟存亡未可知雨館愁腸骨饑僕  
時後先隨猪拾橡栗粵林多蔽天黃柑雜丹橘萬室通  
釀酤撫遠無禁律醉去不須錢醒來弄鳴瑟山水仍奇  
怪已可消憂鬱莫作楚大夫懷沙自沈汨西漢梅子真  
出為吳市卒市卒且不慙况茲別乘秩

雜興

梅聖俞

蘇舜欽監進奏院用例鬻故紙祠神會館

中同列御史劉元瑜彈擊下獄坐監主自  
盜削籍同會者皆坐斥劉謂時宰賈昌朝  
曰為相公一網打盡故聖俞作此詩

主人有十客共食一鼎珍一客不得食覆鼎傷衆賓雖  
云九客沮未已一客嗔古有弑君者羊羹為不均莫以  
天下士西比首陽人

跋東坡和陶詩

黃魯直

東坡謫嶺南時宰欲殺之飽喫惠州飯細和淵明詩淵

明千載人東坡百世士出處雖不同氣味乃相似

律詩

負譴後題于越亭

劉長卿

南天愁望絕亭上柳條新落日獨歸鳥孤舟何處人生  
涯投嶺徼世業陷邊塵江入千峰暮花連百越春秦臺  
憐白首楚水怨青蘋草色無征路鶯聲傍逐臣獨醒翻  
取笑直道不容身得罪風霜苦全生天地仁青山數行  
淚滄海一窮鱗流落誰相見空憐鷗鷺親

楊大年最  
喜此篇

左遷至藍關示姪孫湘

韓愈

一封朝奏九重天夕貶潮陽路八千  
欲為聖明除弊事豈於衰朽計殘年  
雲橫秦嶺家何在雪擁藍關馬不前  
知汝遠來應有意好收吾骨瘴江邊

送唐介之貶所

李師中

孤忠自許衆不與特立敢言人所難  
去國一身輕似葉高名千古重於山  
並游英俊顏何厚已死姦諛骨尚寒  
天意若為宗社計肯教夫子不生還

送唐御史

仲訥

力犯雷霆衆共危，遠投魑魅獨為宜。  
忠州學業真無負，高廟神靈固有知。  
自倚聖明容直道，未甘憔悴死荒陲。  
滿朝卿相多公議，莫把文章作楚詞。

夏日登車蓋亭十絕

蔡持正

公事無多客亦稀，朱衣小吏不須隨。  
溪潭直上虛亭裡，卧展柴桑處士詩。

又

一川佳景踈簾外四面涼風曲檻頭綠野平流來遠棹  
青天白雨起靈湫

又

靜中自足勝炎蒸入眼兼無俗物憎何處機心驚白鳥  
誰人怒劍逐青蠅

又

紙屏石枕竹方牀手倦拋書午夢長睡起莞然成獨笑  
數聲漁笛在滄浪



又

西山髣髴見松筠  
日日來看色轉新  
聞說桃花巖石畔  
讀書曾有謫仙人

又

風搖熟果時聞落  
雨滴餘花亦自香  
葉底出巢黃口鬧  
波間逐隊小魚忙

又

來結芳廬向翠微  
自持盃酒對清暉  
水趨夢澤悠悠過

雲抱西山冉冉飛

又

矯矯名臣郝甌山忠言直節上元間  
古人不見清風在  
歎息思公俯碧灣

又

溪中曾有戈船士溪上今無佩犢人  
病守翛然唯坐嘯  
白鷗紅鶴伴閒身

又

喧飗六月浩無津行見沙洲束兩濱如帶溪流何足道  
沈沈滄海會揚塵

戲答劉文學

黃魯直

人鮪甕中危萬死鬼門關外更千岑問君底事向前去  
要試平生鐵石心

詩話

鬼門關

交趾有鬼門關其南多瘴癘去者罕得生還諺曰鬼門

關十人去九不還唐李德裕貶崖州經此賦詩云一去  
一萬里千人千不還崖州在何處身度鬼門關

到海十里

冠準再相天禧末為丁謂所誣再貶雷州司戶及境吏  
以圖獻抵海岸凡十里公恍然曰少時有到海祇十里  
過山應萬重之句乃今日意耳人生得喪豈偶然耶

崖州相逢

冠忠愍公準之貶也初以列卿知安州既而又貶衡州

別駕又貶道州別駕遂貶雷州司戶時丁晉公與馮相  
拯在中書丁當秉筆初欲貶崖州而丁忽自疑語馮曰  
崖州再涉鯨波如何馮唯唯而已丁乃徐擬雷州丁之  
貶也馮遂擬崖州當時好事者相語曰若見雷州寇司  
戶人生何處不相逢比丁之南也寇復移道州寇聞丁  
當來遣人以蒸羊逆于境上而收其僮僕杜門不放出  
間者多以為得體田歸

乘桴浮海

東坡紹聖四年自惠州再謫昌化寓城南天慶觀初軾  
與弟轍相別渡海既登舟笑謂曰豈所謂道不行乘桴  
浮於海者耶元符間徽廟登極量移廉州由澄邁北渡  
有九死南荒吾不恨茲遊奇絕冠平生之句

此路荊棘

哲宗即位宣仁垂簾蔡確拜左僕射其弟碩賊敗確謫  
守安州夏日登車蓋亭十絕句知漢陽軍吳處厚箋注  
以聞其畧云五篇涉譏諷何處機心驚白鳥誰人怒劍

逐青蠅以譏讒譖之人葉底出巢黃口開波間逐隊小  
魚忙譏新進用事別無謗訕君上睡起莞然成獨笑方  
今朝廷清明不知確獨笑何事矯矯名臣郝甑山忠言  
直節上元間按郝處俊安陸人封甑山公唐高宗欲遜  
位天后處俊上疏諫曰天子治陽道后治陰德魏文帝  
著令帝崩不許皇后臨朝諫此事正在上元三年即上  
元間也皇太后垂簾遵用章獻明肅故事確指武后以  
比太母又云歎息思公俯碧灣按詩綠衣我思古人實

獲我心者衛莊姜妾上僭而作也確以處俊為古又歎  
息而思之其意可見沉沉滄海會揚塵謂人壽幾何尤  
非佳語宣仁盛怒令確分析終不自明時文潞公平章  
軍國事范堯夫位宰相范公曰來日進呈持正事當如  
何潞公曰踰嶠范公曰此一條路荆棘久已生合相公  
不宜踏開王存正仲為右丞深贊其說翼日簾前范力  
爭不勝再拜請從此辭將下殿復奏曰昨日王存與臣  
論同今當俱去存蒼黃不知所為亦拜明日范公罷相



正仲亦出更無押入之禮持正坐貶新州大臣得罪度  
嶺自持正始

古今事文類聚前集卷三十一